

2 Pemimpin Pas didakwa terperangkap agenda UMNO
Utusan Online
December 16, 2011

KUALA LUMPUR 15 Dis. - Pas menyifatkan Pengerusi Jawatankuasa Hal Ehwal Agama Islam, Adat-Adat Melayu, Infrastruktur dan Kemudahan Awam Selangor, Datuk Dr. Hasan Ali dan bekas Timbalan Presiden Pas, Nasharudin Mat Isa telah terperangkap dengan agenda UMNO untuk melemahkan parti itu.

Setiausaha Agung Pas, Datuk Mustafa Ali berkata, kenyataan kedua-dua pemimpin itu kebelakangan ini berhubung kedudukan mereka dalam parti sedikit sebanyak boleh melemahkan Pas.

"Saya buat kesimpulan bahawa kedua-dua mereka telah terheret dengan agenda UMNO yang boleh menjejaskan parti dan sama ada mereka sedar atau tidak sedar, mereka sebenarnya terperangkap dalam agenda musuh politik Pas," katanya ketika dihubungi *Utusan Malaysia* di sini hari ini.

Baru-baru ini, Hasan yang juga bekas Pesuruhjaya Pas Selangor membuat kenyataan sedia bekerjasama dengan UMNO jika diminta demi kepentingan Islam dan Melayu di negara ini serta tidak kisah dengan pengurusan Pas yang dilaporkan tidak akan mencalonkan beliau mempertahankan kerusi Dewan Undangan Negeri (DUN) Gombak Setia.

Dalam pada itu, Nasharudin dalam satu kenyataan baru-baru ini mengatakan beliau hairan dengan perjalanan politik Pas yang didakwanya semakin pelik ekoran tindakan Ketua Penerangan Pas Selangor, Saari Sungib yang mendahului parti berkenaan berhubung kedudukan Hasan yang tidak mendapat pencalonan mencukupi untuk mempertahankan kerusi itu.

Sementara itu, Mursyidul Am Pas, Datuk Nik Abdul Aziz Nik Mat menasihatkan pemimpin parti itu merujuk kepada Pesuruhjaya negeri masing-masing bagi menyelesaikan setiap masalah dalaman parti yang timbul.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=1216&pub=Utusan_Malaysia&sec=Politik&pg=po_01.htm